

# e-BULETIN JSKM

## **Cabaran Wanita**


*Muniroh Hamat*

### **Antara Menarik di Dalam**

- Generate e-Certificates with Autocrat
- Symbolab Matrices
- JJCM Hatyai
- Jika Diri Diuji
- Tentang Kamu
- Pengurusan Rekod
- Musafir Haji
- Wira Sejati

**Edisi April 2023**





Oleh: Farah Hayati binti Mustapa

# MENARA GADIS

Menara Gadis, yang dikenali sebagai *Maiden's Tower*, ataupun Kız Kulesi dalam Bahasa Turki adalah sebuah bangunan bersejarah yang ikonik lagi indah dan merupakan salah satu simbol kota İstanbul, Türkiye. Ia dibina di sebuah pulau kecil yang mana tidak pernah kelihatan dasarnya sehingga kini. Ia terletak di pintu masuk bahagian Asia, selat Bosphorus, lebih kurang 200 meter dari pantai Üsküdar di İstanbul. Ia menjadi lambang cinta dan kasih sayang, juga terkenal di dalam filem, cerita dan kesusasteraan. Menara ini dibina oleh Maharaja Byzantine pada tahun 1110. Selepas penaklukan Byzantine oleh Sultan Muhammad Al-fateh, menara ini berfungsi sebagai menara pemerhati. Menara ini pernah musnah akibat gempa bumi, dibina semula kemudian dirobohkan. Proses roboh dan bina ini berlaku berulang kali pada pemerintahan Sultan-sultan Empayar Uthmaniyah yang lain. Menara ini pernah berfungsi sebagai rumah api pada zaman pemerintahan Sultan Muhammad III. Pada 1829, ia pernah digunakan sebagai stesen kuarantin sebelum diambil alih oleh Sultan Mahmud II pada 1832. Selepas kejatuhan Empayar Uthmaniyah, pada 1945, menara ini telah diambil alih oleh kerajaan Republik Turki. Selepas sahaja selesai dibaik pulih pada 1998, menara ini muncul dalam filem James Bond, *"The World Is Not Enough"*. Seterusnya, selepas gempa bumi dan tsunami pada 1999 di Laut Marmara, struktur sokongan besi ditambah kepada menara supaya lebih kukuh. Kini menara ini dijadikan sebagai tarikan pelancong, terdapat café dan restoran untuk disinggahi dengan menaiki bot yang berlayar dari pantai ke menara pada setiap hari.

Terdapat banyak lagenda tentang asal usul nama Menara Gadis. Lagenda yang masyhur menceritakan bahawa pada zaman dahulu ada seorang raja yang mempunyai puteri yang sangat cantik. Pada suatu hari ahli nujum negara berkata kepada raja, "Apabila puteri Tuanku berumur 18 tahun, beliau akan mati dipatuk ular. Itulah sebabnya, raja membina menara di tengah laut dan mengurung puterinya di menara itu. Baginda juga melaksanakan langkah berjaga-jaga terhadap bahaya ular. Pada suatu hari, puteri raja itu jatuh sakit. Ramai tabib cuba merawatnya, akan tetapi tidak dapat menyembuhkan penyakitnya. Akhirnya setelah sekian waktu, seorang tabib berjaya menyembuhkan penyakit puteri itu. Maka pada hari itu, raja mengisytiharkan untuk mengadakan upacara keraian. Mereka menghantar bakul anggur ke menara sempena upacara itu. Di dalam bakul itu, ada seekor ular kecil yang berbisa. Ular itu telah mematuk puteri raja dan tamatlah riwayat sang puteri di pangkuan ayahandanya. Maka begitulah menara tersebut mendapat nama.

Rujukan:

- 1) Maiden's Tower <https://en.m.wikipedia.org> [Retrieved 3 March 2023]
- 2) Yedi İklim Türkçe A2 Çalışma Kitabı 10. Baskı - Mart 2020